

四庫全書

子部

欽定四庫全書

子部
玉機微義卷五
六

詳校官太醫院醫士臣趙正范

編修臣倉聖脈覆勘

總校官知縣臣繆琪

校對官主事臣陳文樞

謄錄監生臣徐莊文

欽定四庫全書

玉機微義卷五

明

徐用誠 原輯

劉 純 續增

滯下門

腸澼生死脉法

內經曰腸澼便血身熱則死寒則生腸澼下白沫脉沉則生浮則死腸澼之屬身不熱脉不懸絕滑大者生懸瀉者死以臟期之又曰陰陽虛腸澼死又曰泄而脫血

脉實皆曰難治

按此云生死亦是大槩言之必須更兼證以詳審之
下同

脉經云腸澼下膿血脉沉小流連者生數疾且大有熱
者死又腸澼筋攣其脉小細安靜者生浮大緊者死
嚴氏云凡下利之脉微小者生浮洪者難治腸澼下膿
血者脉宜滑大若弦急者死

仲景治痢大法

下痢脉沉弦者下重脉大者為未止脉微弱數者為欲
自止雖發熱不死下痢手足厥冷無脉者灸之不溫若
脉不還反微喘者死 下痢有微熱而渴脉弱者令自
愈下痢脉數有微熱汗出令自愈設脉緊為未解 下
痢脉數而渴者令自愈設不差必清膿血以有熱故也
下痢反弦發熱身汗者自愈 下痢氣蔽者當利其
小便 下痢腹脹滿身體疼痛先溫其裏乃攻其表溫
裏宜四逆攻表宜桂枝湯 下痢脉滑而數者有宿食

也當下之 下痢脉遲而滑者實也痢為未止急下之
下痢脉反滑當有所去下之安 下痢不欲食有宿食
者當下之 下痢腹滿痛為寒實當下之 下痢腹堅
者當下之 下痢譫語有燥屎當下之 下痢三部脉
皆平按之心下堅急下之 下痢已差至其時復發者
此為下未盡更下之安 下痢脉大浮弦下之當自愈
風寒下痢者不可下下後心下堅痛脉遲此為寒宜
溫之 下痢脉浮大此為虛強下之故也設脉浮革者

因而腸鳴當溫之 下痢脉遲緊痛未欲止當溫之
下痢心痛急當救裏可與理中四逆附子輩 下痢大
孔痛宜溫之

按丹溪曰仲景治痢可下者十法可溫者五法或解
表或利小便或待其自己區別易治難治不治之證
至為詳密但與泄痢衄同立論而未分今載於滯下
門內故於瀉痢條內不載宜於此通考焉

東垣治痢法

病機機要云後重則宜下腹痛則宜和身重則除濕脉弦則去風膿血稠粘以重劑竭之身冷自汗以毒藥溫之風邪內縮宜汗之驚澹為利當溫之又云在外者發之在裏者下之在上者湧之在下者竭之身表熱者內疎之小便濇分利之又曰盛者和之去者送之至者止之兵法曰避其銳氣擊其惰歸此之謂也

秘藏云假令傷寒飲食膜脹滿而傳殮泄者宜溫熱之劑以消導之傷濕熱之物而成膿血者宜苦寒之劑以

內疎之風邪下陷者升舉之濕氣內勝者分利之裏急者下之後重者調之腹痛者和之洞泄腸鳴無力不及拈衣其脉弦細而弱者溫之收之膿血稠粘至圓而不能便其脉洪大而有力者寒之下之

按此分風寒濕熱表裏溫補寒下等治至為切當學者尤宜熟玩但其裏急後重腹痛之義未詳今別論於左

太陰受濕傳腎為膿血痢

機要云有太陰經受濕而為水泄虛滑身重微滿不和穀味久則防變而為膿血脾經傳腎謂之賊邪故難愈者若先利而後滑謂之微邪故易痊此皆脾土受濕之所為也

再有風寒二證在泄痢條下

論風寒暑濕皆能作痢

陳無擇云滯下之證內經所載血溢血泄血便注下古方則有清膿血近世呼為痢疾其實一也多由脾胃不

和飲食過度停積於腸胃不能剋化又為風寒暑濕之
氣干之故為此疾傷熱則赤傷冷則白傷風則純下清
血傷濕則下如豆汁冷熱交併赤白兼下治法當先用
通利之藥疎滌臟腑

嚴氏云以巴豆等劑推其積熱後辨以冷熱風濕之證
用藥調治熱赤者清之冷白者溫之傷風而下清血者
則祛逐之傷濕而下豆汁者分利之冷熱相併溫涼以
調之仍須先調胃氣切不可驟用罌粟訶子之藥止之

澁之使停滯不泄多致危殆

按赤白分冷熱之說河間論之甚詳其云風下清血
濕下豆羹汁者蓋謂風喜傷肝肝主血故下清血者
為風也濕喜傷脾脾胃為五穀之海無物不受常兼
四臟蓋豆汁之色如五色之相雜故下豆羹汁者為
濕也又云治法當先通利此迎而奪之之義若有虛
者亦宜審之使果有積滯在腸胃者方所當通利然
嚴氏謂巴豆等藥使用之於傷冷物則可若用之於

熱者為害非輕又云風則祛逐所謂祛逐者果何法
何藥與若以邪氣當祛逐則豈獨於風而寒濕熱為
不可耶此又失於明白

論滯下分三因

陳無擇云古方風停膚腠下瘀血或下鮮血濕毒下如
豆羹汁皆外所因之明文也古方有五洩因臟氣鬱結
隨其所發使利膿血作青黃赤白黑色一一不同即內
所因也又飲食冷熱酒醴醢醢縱情恣慾房室致傷精

血腸胃粘滯久積冷熱遂成毒痢皆不內外因治之先
推其歲運以平其外察其鬱結以調其內審其所傷以
治不內外條然明白不致妄投也

按此所分三因治法其理甚當但外因六淫所傷者
古方用藥則多有之內因臟氣鬱結與夫飲食房勞
而得者諸方則未之見也凡三因所傷皆能干犯腸
胃而為痢今陳無擇立論有三因之分而用藥無三
因之別此又所當分而治者失於開示焉

時疫作痢

大全良方云有二方一家之內上下傳染長幼相似是疫毒痢也治法雖當察運氣之相勝亦不可狎泥當先察其虛實冷熱首用敗毒散加人參甘草陳皮隨證用之

按時疫作痢歲常有之其謂當察其運氣之相勝與病冷熱虛實之不同誠為確論蓋欲學者知五運六氣有太過不及勝負之不同以分風寒暑濕燥火為

病而平治之也然首專用敗毒散之義何其自狎泥也

論食毒作痢

陳無擇云飲服冷熱酒醴醢腸胃粘溢久積冷熱遂成毒痢

嚴用和云或有飲服冷酒寒物房室勞傷精血而成久毒痢則宜化毒以保衛之

按人之飲食過傷恣食辛熱寒冷之物皆能致傷腸

胃腸胃一傷不能運化傳送遂蓄積停滯而為痢經
日飲食不節起居不時者陰受之陰受之則入五臟
膈滿閉塞下為飧泄久為腸澼是也治法當先消化
食毒或可攻伐然後隨寒熱溫涼以調之此二論本
諸內經而世所未言者也

論裏急後重

病機云裏急後重脉大而洪實為裏熱甚而閉是有物
結墜也若脉浮大甚不宜下雖裏急後重而脉沉細弱

者謂寒在內而氣散也可溫養自愈裏急後重閉者大腸經氣不宣通也宜加檳榔木香宣通其氣原病式云下迫後重裏急窘迫急痛也火性急速而能燥物故也按裏急者窘迫急痛是也後重者大腸墜重而下也夫裏急後重其證不一有因火熱者所謂火性急速而能燥物是也有因氣滯此大腸經氣壅而不宣通也有因積滯壅盛者是有物結墜也有氣虛者此大腸氣降而不能升也有血虛者所謂虛坐努責是也

治法火熱者寒之清之氣滯者調之積滯者去之氣
虛而降者升之舉之血虛者補之各察其所因也切
觀前論未為詳盡

論泄痢而嘔

病機云如痢或泄而嘔者胃中氣不和也上焦不和治
以生薑橘皮中焦不和治以芍藥當歸桂茯苓下焦不
和而寒治以輕熱甚以重熱藥

按此云泄痢而嘔謂胃氣不和所致蓋亦有胃中火

逆衝上而嘔者有胃虛而嘔者有積滯毒氣上攻而嘔者有陰虛而嘔者豈可一於胃氣之不和而不他及耶

論泄痢腹痛

機要云腹痛者和之如發熱惡寒腹不痛藥加黃芩為主腹痛甚者加當歸倍芍藥

按泄痢腹痛其證甚多皆因內氣鬱結不行所致理宜行氣散鬱為先然亦有挾寒有挾火熱者有因積

滯者有血虛者又宜隨證處治為當也今機要云和
之一字總言之耳蓋加當歸倍芍藥之法惟血虛可
用

論禁口痢

百一選方云禁口痢是毒氣上衝心肺所致用石蓮肉
以通心氣

按痢而能食知胃未病也若脾胃濕熱之毒薰蒸清
道而上以致胃口閉塞而成禁口之證理宜除胃口

之邪熱而此云毒氣上衝心肺其毒不知指何者之邪然亦有脾胃虛而得者亦有誤服利劑藥毒犯胃者又有服瀉熱之劑太早而邪氣閉遏於胃口者必當求責

論下痢吃逆

丹溪曰吃病氣自下衝上屬火之象古方悉以胃弱言之殊不知胃弱者陰弱也虛之甚也滯下之久多見此證乃因久下而陰虛也

詳見吃逆本門

辨痢色分五臟

原病式曰瀉白為寒青黃紅赤黑皆為熱也蓋瀉白者肺之色也由寒水制火不能平金則金肺自甚故色白也痢色青者肝木之氣由火甚制金不能平木故色青也或言痢色青為寒者誤也仲景少陰病下痢清水色純青熱在裏也大承氣湯下之及小兒熱甚急驚痢色多青為熱明矣痢色黃者由火甚則水必衰而脾土自旺故色黃也痢色紅為熱心火之色也或赤熱深甚也

至若痢色黑亦言熱者由火熱亢甚則反兼水化制之

故色黑也故傷寒陽明病

云云

法當大承氣下之大便

不黑者難

恐作易

治諸痢同法

按世人多以瀉痢之青白黑三色為寒黃赤二色為熱今觀河間分五臟之論煥然耳目而知世人之非也或曰內經視絡脉之色曰寒多則凝泣凝泣則青黑熱多則淖澤淖澤則黃赤又曰黃赤則熱多白則寒世俗之論豈非本於此與愚曰內經論經脉之常

色心赤肺白肝青脾黃腎黑也陰絡之色應其經但陽絡之色隨四時而行應無常色遇天氣之寒則經絡凝泣故其色多青黑遇天氣之熱則經絡淖溢故其色多黃赤此蓋因外氣之寒熱而浮絡相應而然凡人之在冬月炎天與夫久坐遠行其面色相應亦皆然非痢色之出於臟腑隨內氣所感而生也況滯下之證多因濕熱所致內經曰肺熱者色白而毛敗心熱者色赤而經絡溢肝熱者色蒼而爪枯脾熱

者色黃而肉蠕動腎熱者色黑而齒槁此雖論痿亦
可見五臟之內熱皆能顯此五色今滯下之論五色
意實相同然此不可與浮絡之因外氣相應者同語
也

辨赤白分冷熱之誤

原病式曰或言下痢白為寒者誤也若果為寒則不能
消穀何由反化為膿也所謂下痢穀反為膿血如世
之穀肉果菜濕熱甚則自化腐爛潰發化為膿血也其

熱為赤熱屬心火故也其濕為黃濕屬脾土故也燥鬱
為白屬肺金也經曰諸氣憤鬱皆屬於肺謂燥金之化
也然諸瀉痢皆兼於濕今反言氣燥者謂濕熱甚於腸
胃之內而腸胃拂鬱結而又濕至於否以致氣液不得
宣通因以成腸胃之燥使煩渴不止也假如下痢赤白
俗言寒熱相兼其說尤誤豈知水火陰陽寒熱者猶權
衡也一高則必一下一盛則必一衰豈能寒熱俱甚於
腸胃而同為痢乎如熱瘡瘍而出白膿者豈可以白為

寒與其在皮膚之分屬金故色白也次在血脉之分屬
心火故為血也在肌肉屬脾土故作黃膿在筋部屬肝
木故其膿色帶蒼深至骨屬腎水故紫黑血出也各隨
五臟之部而見五色是其標也本則一出於熱但分淺
深而已大法下迫窘痛後重裏急小便赤澀皆屬燥熱
而下痢白者必多有之然則為熱明矣

按河間謂赤白不當分冷熱乃屬肺金心火之化又
謂五色各屬五臟本則一出於熱其論至當但世患

此疾者赤白居多今既以不當分冷熱為治若專以
辛苦寒退熱此則治本之法所謂心火肺金之化者
抑有別與蓋心主血肺主氣白屬肺金此氣受病也
赤屬心火此血受病也赤白相雜血氣俱受病也知
此則肝青脾黃腎黑之說亦可得而互明矣

論熱藥治痢之誤

原病式云或曰白痢既為熱病何故服辛熱之藥亦有
愈者耶蓋辛熱之藥能開發腸胃鬱結使氣液宣流通

濕潤燥氣和而已蓋病微者可愈甚者鬱結不開其病轉加而死矣凡治熱甚吐瀉亦然夫治諸痢者莫若以辛苦寒藥治之或微加辛熱佐之則可蓋辛能發散開通鬱結苦能燥濕寒能勝熱使氣宣平而已如錢氏香連丸之類是也故治諸痢者黃連黃柏為君以其至苦大寒正主濕熱之病乃若世傳辛熱金石毒藥治諸吐瀉下痢或有愈者以其善開鬱結故也然雖亦有驗者或不中效反更加害

按治痢用辛苦寒之劑開鬱燥濕勝熱三法俱備世
之用辛熱金石毒藥者誠非也然亦有久痢腸胃虛
滑者亦當求責

治痢通因通用之法

子和云夫下痢膿血腹痛不止可用調胃承氣湯加薑
棗煎更下藏用丸瀉訖以五苓散元散調下又一男子瀉
痢不止如傾不敢冷坐諸醫皆以為寒治延二十載兩
手寸脉皆滑余不以為寒所以寒者水也以茶調散湧

寒水五七升又以無憂散泄積水數十行乃通因通用之法也次以淡劑利水道

按此用吐下以治痢本內經通因通用之說使腸胃虛滑者其可下乎中氣虛弱者其可吐乎今云可下者謂有積滯在腸胃壅不通者也可吐者謂有痰飲在膈上氣不能降以致大腸不能收斂者也

丹溪曰積濕成痰在肺中宜大腸之不固也清其源則流自清矣正是此意

論局方用熱藥瀉藥之非

丹溪曰洩痢一證局方用鍾乳健脾丸朝真丹訶藜勒
九大溫脾丸等藥皆用熱藥為主治瀉藥為佐使當為
腸虛感寒而成滑者設也彼瀉痢者將無熱證耶將無
積滯耶內經曰痢有膿血多屬滯下夫瀉痢證其類尤
多先賢曰濕多成泄此確論也然有挾風者固不可得
而同矣况風與濕之外又有雜合受邪似難例用瀉熱
之藥局方出證有兼治裏急者有兼治後重者有兼治

裏急後重者此豈非滯下病乎今瀉痢與滯下衆同論
治實實虛虛之患將不俟終日矣經曰暴注下迫皆屬
於熱又曰暴注皆屬火又曰下痢清白屬於寒屬火熱
者二屬水寒者一瀉痢一證似乎屬熱者多屬寒者少
局方專以瀉熱為用若用之於下痢清白為寒者或可
矣所謂下迫者即裏急後重之謂也其病屬火相火所
為其毒甚於熱矣投以瀉藥非殺而何

滯下亦有挾虛挾寒

丹溪曰或問河間之言滯下似無挾虛挾寒者乎否乎
予曰洩痢之病水穀或化或不化並無努責惟覺困倦
若滯下則不然或膿或血或膿血相雜或腸垢或無糟
粕或糟粕相混雖有痛不痛大痛之異然皆裏急後重
逼迫惱人似乎皆熱證實證也予近年涉歷亦有大虛
大寒者不可不知敢筆其畧以備采覽予從叔年踰五
十夏間患滯下病腹微痛所下褐色後重頻併穀食大
減時有微熱察其脉皆弦而澁似數而稍長却喜不甚

浮大兩手相等視其神氣大減予曰此滯下憂慮所致
心血虧脾氣弱耳遂以參朮為君當歸陳皮為臣川芎
炒芍藥茯苓為佐使時暄熱甚加少黃連兩月而安婁
長官年三十餘奉養厚者夏秋間患滯下腹大痛有人
教服單煮乾薑與一貼則痛定少頃又作又與之定由
是服乾薑至三斤八日視之左脉弦而稍大似數右脉
弦而大稍減亦似數重取之似緊予曰此必醉飽後吃
寒涼太過而當作虛寒治之因其多服乾薑遂教用四

物湯去地黃加人參白朮陳皮酒紅花茯苓桃仁煎入
生薑汁飲之至一月而安金氏婦年近四十秋初尚熱
患滯下腹但隱痛夜重於晝全不得睡食亦稍減口乾
不飲已得治痢靈砂二貼矣予觀之兩手脉皆澁且不
勻神思倦甚飲食全減因與四物湯倍加白朮以陳皮
佐之與十數貼而安此三病者若因其逼迫而用峻劑
豈不悞人

按滯下之證古人多與泄瀉同論至三因方始能另

立條目蓋實有不同夫病有從外感而得者須分六氣之異外既受傷腸胃鬱結遂成赤白等證當隨其寒熱溫涼以調之有因臟氣發動干犯腸胃而得者須察其何臟相乘以平治之又有因飲食失節而得者則又審其何物所傷以消剋之世之感此疾者其因誠不越乎是三者但其受病之後腸胃拂鬱膿血稠粘裏急後重諸方雖有寒熱虛實之論劉河間則以為一出於熱然考之內經似亦熱多而寒少也我

丹溪先生則以為亦有挾虛挾寒之證深戒學者須
宜識此世之局方不辨三因專用瀉熱之藥其失甚
矣至河間立說專用苦寒疎下之藥則亦未甚為當
何則蓋病有虛實治有先後若病氣暴至元氣壯實
積滯膠固須宜下之病久氣脫腸胃虛滑不禁者亦
宜溫之瀉之大抵治病當從仲景河間之法可溫則
溫可下則下或解表或利小便或待其自已劉河間
分別在表在裏挾風挾熱挾寒等證後之作者無越

於斯但氣血一條未嘗表出立論其於芍藥湯下有
曰行血則便自愈調氣則後重除蓋謂溲便膿血血
之滯也故曰行血自愈奔迫後重氣之實也故曰調
氣自除誠哉是言但膿血赤白亦有氣病血病之分
後重裏急亦有氣實血虛之異學者又不可不察詳
見前論

滯下治法

治熱之劑

仲景白頭翁湯治熱痢重下者

白頭翁

二兩

黃連

三兩

黃柏

三兩

秦皮

三兩

右四味以水七升煮取二升去粗服一升不愈再服
按此治痢在下焦腎虛有熱也經云腎欲堅故用純
苦之劑以堅之出太陰例藥也以其下痢屬太陰故
也

機要黃芩芍藥湯治泄痢腹痛或後重身熱久不愈脉
洪疾及下痢膿血稠粘

黃芩

芍藥

各二兩

甘草

五錢

右咀每服半兩水一觔半煎一觔溫服

按此手足太陰經之藥也仲景用芍藥甘草湯以復其陰酸以收之甘以緩之酸甘相合以補陰血也芍藥白者補赤者瀉出太陽芍藥甘草例

大黃湯治泄痢久不愈膿血稠粘裏急後重日夜無度

大黃 一兩

右細剉好酒二大觔同浸半日許再同煎至一觔半

去大黃將酒分為二服頓服之痢止一服如未止再服取利為度後服芍藥湯以和之利止再服黃芩芍藥湯徹其毒也

按此乃陽明調蕩滌邪熱之藥用酒煎者欲其上至頂顛外徹皮毛也

芍藥湯下血調氣經曰澀而便膿血知氣行而血止也行血則便自愈調氣則後重除

芍藥 一兩

當歸

黃連 各半兩

檳榔

木香

各二錢

桂二錢半

大黃

三錢

黃芩

半兩

甘草

二錢炙

右咀每服半兩水煎食後溫服清如利不減加大黃
按此行血調氣不熱之藥也大凡用藥之雜與品味
之多者難以細分經絡當觀其大體如何此則太陽
桂枝例藥也

白朮黃芩湯服前藥痢雖除更宜此調和

白朮

一兩

黃芩

七錢

甘草

三錢

右咀勻作三服水煎服清

按此去濕熱和中活血之藥也

錢氏芍藥藥皮丸

芍藥

黃栢

各等分

右為末水丸

守真芍藥藥皮丸治一切濕熱惡痢

芍藥

黃栢

各一兩

黃連

半兩

當歸

半兩

右為末水丸如小豆大

按此二方補陰降火下焦之藥也出太陽例

局方黃連阿膠丸治冷熱不調赤白下痢

阿膠

炒二兩

黃連三兩

茯苓

二兩

右水熬阿膠膏澁和二末為丸米飲服

按此補虛退熱除濕之藥也出太陽例海藏云以上苦寒之劑元病不經內傷冷物者宜察亦當審人之虛實及以脉別之

治寒之劑

局方桃花丸治冷痢腹痛下如魚腦白物

赤石脂

煨

乾薑

炮各等分

右為末蒸餅糊丸米飲下三四十丸日三服

按此出陽明例藥方

丹溪曰桃花丸即要畧桃花湯也仲景以治便膿血
用赤石脂丸者乾薑粳米同煮作湯一飲病安便止
後藥意謂病下焦血虛且寒非乾薑之溫石脂之澁
且重不能止血粳米味甘引入腸胃不使重澁之體

少有凝滯藥行易散餘毒亦無局方不知深意改為
丸藥劑以麴糊日與三服果能與仲景之意合否也
嚴氏當歸丸治冷留腸胃下痢純白腹痛

當歸

酒洗

芍藥

附子

炮去皮臍

白朮

乾薑

炮

厚朴

阿膠

各一兩

烏梅肉

二兩

蛤粉

炒各一兩

右為細末醋糊丸桐子大每服五十丸米飲送下

局方訶藜勒散治腸胃虛弱泄利水穀漸成痢疾

青皮

去穰

肉豆蔻

麩裏煨

肉桂

五錢

附子

炮去皮臍一兩

訶子仁

各四兩

右為末每服三錢薑三片煎服

按局方以白痢為寒多用辛熱燥毒之藥若用之於下痢清穀腸虛感寒者或可矣若膿血稠粘屬火之證用之非殺而何但感寒之證吾恐什百而一二也

冷熱之劑

古方駐車丸治冷熱下痢腸滑赤白

金匱要略卷五
黃連

六兩

乾薑

當歸

各二兩

阿膠

右先以醋煮膠令消入前三藥和勻衆手凡桐子大
米飲下

局方香連丸治冷熱不調下痢赤白膿血相雜裏急後
重

黃連

去蘆二十兩用吳茱萸十兩同炒令赤色去
茱萸不用

木香

四兩八錢不見火

右為細末醋糊丸桐子大每服二十丸空心米飲下

按此出太陰例藥也

戊己丸治胃經受熱泄痢不止

黃連

吳茱萸

去梗炒

白芍 各五兩

右為細末麴糊丸桐子大每服三十丸米飲下

按此出厥陰已寒例以上三方出證治冷熱下痢蓋
冷熱異氣水火相反豈能同在腸胃為病耶論中辨
之詳矣但其製方亦有暗合妙理惜乎世人莫知其
深意也三方皆以黃連苦寒之藥為君正治濕熱之

氣佐以辛苦溫藥所以開鬱行滯氣血宣通病亦自
已乾薑木香茱萸三者各隨經合宜而用要在學者
臨機應變又不可拘執於此也

治風之劑

機要防風芍藥湯治泄痢飧泄身熱脉弦腹痛而渴及
頭痛而微汗

蒼朮防風湯治泄痢脉弦頭痛

良方神朮散治春傷於風夏必飧泄

瀉門以上三方並見泄

澹寮方倉廩湯治下痢頭痛心煩不食

局方敗毒散四錢加陳倉米百粒薑棗煎服

按此乃發散風寒之劑出太陽例藥也

治熱之劑

機要白朮芍藥湯治脾經受濕水泄注下蒼朮芍藥湯

同

仲景五苓散

宣明益元散

以上四方並見泄瀉門

治暑之劑

局方黃連香薷飲治感暑下痢鮮血

方見暑門

按此解散暑熱心肺藥也出太陰厚朴例

宣明桂苓甘露飲

子和桂苓甘露飲

方並見暑劑

按此三方解表利小便大瀉濕熱氣分藥也太陽經藥也

攻下之劑

仲景大承氣湯

方見下劑

按此泄熱蕩滌腸胃之劑痞滿燥實四證者可用出陽明例藥也

宣明玄青丸治下痢勢惡頻併窘迫或久不愈諸藥不能止須可下之以開除濕熱痞悶積滯

黃連

黃栢

大黃

甘遂

芫花

醋拌炒

大戟

各半兩

牽牛

四兩取末二兩

輕粉

二錢

青黛

一兩

右為末勻水丸小豆大初服十九每服加十九日三以快利為度

機要厚朴枳實湯治虛滑久不愈多傳變為痢先以此湯防其傳變

厚朴

一兩

枳實

炒一兩

訶子皮

一兩半生熟

黃連

甘草

炙

大黃

各三錢

木香

半兩

右為末每服三五錢水煎服

按以上三方逐積去熱之藥也大黃瀉血也牽牛瀉

氣也甘遂大戟芫花泄水也厚朴枳殼泄痞滿也各隨其病所宜選而用之

局方蘇合丸去臟腑有積下痢

以蘇合香丸與感應丸二藥和勻如粟米大每服五丸淡薑湯空心下

按局方之學多以此治痢去積故錄於此然二藥之類聚溫熱用於傷寒傷冷之物者則可然有熱之人積滯雖去熱毒必行其害何可勝言哉

本事方靈砂丹治一切積痢

礪砂

硃砂

並研細各二錢半

右用黃蠟半兩巴豆三七粒去殼皮膜同於銀石器
內重湯煮一伏時候巴豆紫色為度去二七粒止將
一七粒與前藥同研極勻溶蠟和藥旋丸菴豆大每
服三九至五丸水瀉生薑湯下白痢艾湯下赤白痢
烏梅湯下空心服

丹溪曰仲景治痢之法下者率用承氣加減何嘗以

砒巴豆丹硃決烈燥毒之劑蓋大黃之寒其性善走
佐以厚朴之溫善行滯氣緩以甘草之甘飲以湯液
灌滌腸胃滋潤輕快無所留滯積行即止此砒丹巴
硃熟毒類聚成丸其氣凶暴其體重燥積垢雖行毒
氣未歇借使有愈疾之功其腸胃清淳之氣能免旁
損暗傷之患乎

消積之劑

脾胃論聖餅子治瀉痢赤白臍腹撮痛久不愈

黃丹

二錢

定粉

三錢

蜜陀僧

二錢

舶上硫黃

三錢

輕粉

少許

右為細末入白麪四錢滴水如指尖大捻作餅子
陰乾食前漿水磨化服之大便黑色為妙
元戎聖功丸專治血痢

膩粉

三錢七

定粉

二錢七

一法加蛤粉

右研勻水浸蒸餅丸菴豆大艾湯下

止瀉之劑

仲景桃花湯治下痢便膿血

赤石脂

一斤半劉一半末

乾薑

一兩

粳米

一升

右三味以水七升煮米令熟去滓溫七合內赤石脂末方寸七日三服若一服愈勿再服

按此方出手陽明例藥也但赤治丙而白治庚也

嚴氏禹餘糧丸治腸胃虛寒滑泄不禁

禹餘糧石

煨

赤石脂

煨

龍骨

畢撥

乾薑

炮

訶子

麩裏煨

肉豆蔻

麩裏煨

附子

炮去皮臍各等分

右為末醋糊丸桐子大每服七十九空心米飲下

局方真人養臟湯治冷熱不調下痢赤白裏急後重腹

痛脫肛

罌粟殼

去蒂蓋蜜炙三兩六錢

人參

當歸

各六錢肉桂八錢

訶子皮

一兩二錢

木香

二兩四錢

肉豆蔻

麩裏煨半兩

白芍

一兩六錢

生甘草

一兩八錢

白朮 六錢

右咀每服四錢水煎服臟寒加附子

水煮木香九治一切下痢赤白膿血相雜裏急後重

罌粟殼 去穰一兩四錢

青皮 去白二兩八錢

甘草 二兩四錢

當歸 洗去蘆六兩

訶子 炮去核八兩

木香 不見火六兩

右為末蜜丸如彈子大每服一九水八分盞煎化溫

服

祕藏訶子散治腸胃虛寒泄瀉米穀不化腸鳴腹痛脫肛及作膿血日夜無度

御米殼

去蒂蓋蜜炒半兩

訶子

煨去核七分

乾薑

炮六分

橘皮

半錢

右為細末分作二服水煎和滓熟服空心下

十劑云澁可以去脫以米殼之酸微澁上收固氣去脫主用為君以訶子皮之微酸上收固血治其形脫橘皮微苦溫益真氣升陽為之使以乾薑大辛熱除

寒為臣亦為主治也

按以上諸方皆行溫熱之藥固氣止血緊流腸胃當為腸虛感寒而成滑者設也且滯下之證多屬於熱兼有積滯局方一門專主澁熱似難例用

宣明香連丸

木香

訶子肉

麩煨

黃連

兩 炒各半

龍骨

一錢

右為細末飲九黍米大每服二十九米飲湯下

機要訶子散治泄痢腹痛漸以泄下微少宜此止之法

云大勢已去而宜止之

訶子皮 一兩半生半熟

木香 半兩

黃連 三錢

甘草 炙三錢

右為細末每服二錢以白朮芍藥湯下如止之不已
宜歸而送之加厚朴一兩竭其邪氣也

脾胃論訶黎勒丸治休息痢日夜無度腥臭不可近
臍腹撮痛

椿根白皮 訶子肉 半兩
母丁香 三十個

右為細末醋糊為丸如桐子大每服五十丸溫米飲下

按以上諸方用溫涼之藥以上痢較之局方專用澁熱則變法矣夫脫則用澁理所當然脫而挾寒溫之熱之可也脫而挾熱涼而澁之可也寒熱各隨所宜而用似難偏執一說

宣明三聖散治產後下血痢不止

烏魚骨

燒綿灰

血餘灰

各等分

右細末每服一錢煎石榴皮湯調下熱服

按此專主止血之劑

收斂之劑

嚴氏烏梅丸治熱留腸胃下痢純血臍腹痛

烏梅肉

二兩

當歸

枳殼

各一兩

黃連

二兩

右為細末醋糊丸桐子大每服七十九食前米飲下
元戎烏梅散治下痢津少大渴引飲不休

烏梅

焙乾半兩

茯苓

一兩

木瓜

一兩

一法加桂三錢半

右咀每服五錢生薑三片煎

按仲景烏梅丸治傷寒吐衄後人用治下痢此皆酸收之義出太陽桂苓例藥也

血劑

局方胃風湯治風冷乘虛入客腸胃水穀不化泄瀉注下及腸胃濕毒如下豆汁或下瘀血日夜無度

人參

白茯苓

芍藥

桂

當歸

白芍

白朮

各等分

右粗散每服二錢入粟米數粒同煎食前服

按此方名為治風而實非治風乃補血和血益胃氣之藥下血痢而挾虛者實可倚仗出太陽桂苓例藥也

良方加味四物湯治血痢

四物加阿膠艾葉

保命集一方四物內加槐花黃連御米殼等分

按此補血溫血之藥出厥陰例藥也

宣明白朮湯治孕婦痢膿血

白朮

黃芩

當歸 各等分

右為末每服三二錢水煎食前服

補劑

良方十全大補湯治一切婦人病痢四十日諸藥不愈

六脉沉弱大凡痢脉宜沉宜弱但服此藥而愈

方見補劑

右薑棗煎成加白蜜半匙再煎數沸服

良方治妊娠下痢腹痛小便澀

糯米一合

當歸炒

黃芪各一兩

右細切和勻水煎服

按此二方不分經絡補血之劑今人治痢而用此者
蓋鮮矣殊不知血氣虛脫之人與夫胎前產後之證
此法不可無也故特立條目以表章之

雜方

良方治疫毒痢敗毒散多加人參甘草陳皮薑棗煎服

按此方詳見論中

嚴氏茜根丸治一切毒痢及蠱注利血下如雞肝心煩

腹痛

茜根

洗

川升麻

犀角

地榆

當歸

黃連

枳殼

白芍

右等分為末醋煮米糊為丸如桐子大每服七十丸
空心米飲下

按此方消化死血解飲食毒之藥

百一選方治禁口痢

石蓮去殼留心并肉碾為細末每二錢陳皮飲調下此是毒氣上衝心肺借此以通心氣便覺思食
澹寮方治禁口痢毒氣上衝心肺者

敗毒散

四錢

陳倉米

一百粒

薑三片棗一枚煎

右方治脾胃虛弱禁口痢用山藥一味剉如小豆大
一半銀器內炒熟一半生用同為末米飲調下

按禁口痢古人論之者少故留此三方以備急然石蓮之通心氣敗毒散散表邪山藥之補脾胃果能開胃口而進食乎

導氣湯治下痢膿血裏急後重腹疼作渴日夜無度

黃連

黃芩

大黃

白芍

當歸

木香

檳榔

右咬咀水煎

此方即前芍藥湯加減桂甘草二味今人多如此用

故收入

玉機微義卷五

欽定四庫全書

玉機微義卷六

明 徐用誠 原輯

劉 純 續增

泄瀉門

此門宜與滯下看

瀉痢生死脉法

內經云脉細皮寒少氣泄利前後飲食不入是謂五虛
死其漿粥入胃泄注止則虛者活

脉經云洩注脉緩時小結者生浮大數者死又洞洩食

不化不得留下膿血脉微小連者生緊急者死

脉訣云下利微小即為生脉大浮洪無差日

仲景治利大法

東垣治利大法

按此並見滯下門

瀉分寒熱

病機機要云藏府瀉利其證多種大抵從風濕熱論是
知寒少熱多寒則不能久也故曰暴瀉非陽久瀉非陰
大便完穀下有寒有熱熱者脉疾身多動音聲響亮暴

注下迫此陽也寒者脉沉而細身不動作目睛不了了
飲食不下鼻準氣息者姜附湯主之若身重四肢不舉
朮附湯主之

按此以瀉之久暴分陰陽正如傷寒之病始為寒而
終則傳變而為熱也然亦必以脉證參訂焉

原病式曰瀉白為寒青黃紅赤黑皆以為熱也大抵瀉
利小便清白不洽為寒赤色者為熱又完穀不化而色
不變其利脾氣虛弱畏冷小便清白不澁身涼不渴脉

遲細而微者寒也穀雖不化而色變非白煩渴小便赤
澁者熱證也凡穀消化無問色及他證便為熱也寒泄
而穀消化者未之有也或火性急速傳化失常穀雖不
化而飧泄者亦有之矣仲景云邪熱不殺穀然熱得濕
則飧泄也

論瀉痢有濕有熱有風有寒

機要云有太陰經受濕而為水泄虛滑身重微滿不知
穀味久則防變而為膿血脾經傳腎謂之賊邪故難愈

若先利而後滑謂之微邪故易痊此皆脾土受濕之所為也

有厥陰經下痢不止其脉沉而遲手足厥逆涕唾膿血此難治宜麻黃湯小續命汗之此有表邪縮於內當瀉表邪而愈

有暴下無聲身冷自汗小便自利大便不禁氣難布息脉微嘔吐急以重藥溫之漿水散是也

論暴注屬火

子和云夫暴注瀉水不已內經曰注下也注下水利也
暴速甚者屬火宜用水調桂苓甘露飲五苓益元散或
以長流水煎放冷服涼膈通聖亦能治之慎不可驟用
嬰粟殼乾薑豆蔻之類縱瀉止亦轉生他疾止可分陰
陽利水道而已

按以上所論辨寒熱風濕火等證所以明六淫之邪
皆能為瀉為注者亦當各隨所淫之邪分而治之可
也

論胃氣下降為飧泄

機要云夫脾胃同濕土之化主腐熟水穀胃氣和平飲食入胃精氣則輸於脾土歸於肺行於百脉而成榮衛若飲食一傷起居不時損其胃氣則上升精華之氣反下降是為飧泄久則太陰轉少陰而為腸澼

論春傷於風夏必飧泄

機要云春宜緩形形緩動則肝木乃榮反靜密則是行秋令金能制木風內臟夏至則火盛而金去獨火木旺

而脾土損矣輕則飡泄脉泄穀不化重則下痢膿血稠
粘良方云經云春傷於風夏必飡泄蓋風喜傷肝春時
木旺不受邪反移氣尅於脾土脾既受尅不能運化因
成積滯夏秋之間再感暑濕風冷之氣發動而成痢也

論飡泄屬風宜汗

子和云飡泄不止完穀不出發汗可也桂枝麻黃湯主
之此證以風為根蓋風隨汗出也

按飡泄證機要謂胃氣下流及春行秋令良方謂春

木旺移氣尅脾二論雖殊要之皆因風木傳變而脾土受邪爾子和謂風隨汗解此論固是然亦須隨其傳變而治不可執此一法也

瀉分三因

三因嚴氏云泄瀉一證經中所謂洞泄飧泄溏泄溢泄濡泄米穀注下是也所因有內外不內外差殊耳經云春傷於風夏必飧泄又云濕勝則濡泄寒甚則為泄暑熱盛之亦為泄至於七情感動臟氣不平亦致溏泄其

如飲食不節過食生冷而成泄瀉者乃脾胃有傷也但
停滯泄瀉一證直須積滯已消然後用以斷下藥今人
往往便固止之多成痢疾者矣治法先理中焦次分利
水穀治中不效然後斷下

按此三因所分甚詳但外所淫者既六而立方止有
其二內之七情為證而又不詳及於治法

治瀉痢用吐下汗三法

子和云一僧臟腑不調三年不效此洞泄也以謀慮不

決而成肝主謀慮甚則乘脾脾濕不流乃上湧痰半盆
又以舟車凡濬川散下數行仍使澡浴出汗自爾日勝
一日常以胃風湯白朮散調養之

按子和為治大率多用此三法洞泄一證縱其果有
積滯鬱結之甚元氣壯實者亦不宜驟用此三法况
有積滯雖甚而元氣尤虛者哉設使果當用此三法
者亦當如仲景察證以辨其吐汗下者有不可下
之殊况仲景治痢又有合下合溫之法焉此得非孟

浪乎

丹溪論局方用熱藥澁藥治痢之誤

按此見滯下門

謹按泄瀉一證古方率以為腸胃虛寒與風冷乘之為論故多行澁熱之劑彼瀉痢者豈無積滯豈無熱證乎今觀病機機要所論有屬寒屬風濕屬火之證此因於外而傷者也又云厥陰經動并胃氣下降為瀉痢三因所言七情感動臟氣不平亦致溏泄此則

因於內而傷者也外則當調六氣內則當平五臟況
又有飲食所傷腸胃停滯所致者治法各不同也然
更有因胃氣下流而泄者在法則當升舉因風而成
飧泄者則當解散因痰積於上焦以致大腸之不固
而泄者又當去上焦之痰而不治其瀉因脾胃氣虛
而泄者又當補中益氣使胃氣升騰而泄自止蓋各
求其本而治可也

泄瀉治法

治濕之劑

機要白朮芍藥湯治太陰脾經受濕水泄注下體重微滿困弱無力不欲飲食暴泄無數水穀不化宜此湯和之身重暴下是大勢來亦宜和也

白朮

芍藥 各一兩
甘草 五錢

右剉每服一兩水煎

治濕瀉茯苓湯又治食瀉濕熱

白朮

茯苓 各七錢半

右咀每服一兩水煎食前服 一方有芍藥三味等
分名白朮散

按以上三方和中除濕足太陰陽明經藥也白朮之
甘入胃而除脾胃之濕芍藥之酸澀除胃中之濕熱
四支困茯苓利水道而除濕此三味泄痢須用之藥
也

蒼朮芍藥湯如前證

蒼朮 二兩

芍藥 一兩

黃芩 半兩

右劉每服一兩加淡味桂半錢煎服清

按此解散濕熱上中二焦之劑太陰經的藥也

良方胃苓湯治夏秋之間脾胃傷冷水穀不分泄瀉不止

五苓散 平胃散

右和合薑棗煎空心服

按此乃表裏除濕之劑東垣所謂上下分消其濕是也太陽太陰經藥也出陽明飲痞例

仲景五苓散

宣明益元散

方並見濕劑

按以上二方除濕利小便之劑太陽經的藥也

治風之劑

機要防風芍藥湯治泄痢飧泄身熱脉弦腹痛而得及頭痛微汗

防風

芍藥

黃芩

各一兩

右咀每服半兩水煎服清

按此治風辛涼之劑太陰太陽經藥也

蒼朮防風湯治泄痢脉弦頭微痛

蒼朮

二兩

防風

一兩

一方蒼朮四兩麻黃一兩防風五錢薑七片煎

按此足太陰陽明經藥也

良方神朮散治春傷於風夏必飧泄

蒼朮

一斤

藁朮

川芎

各六兩

羌活

四兩

粉草

細辛

一兩六錢

右粗末每服三錢薑三片煎要出汗加蔥白

按以上三方治風勝濕辛溫之劑此則太陽經藥也
局方胃氣湯治大人小兒風冷乘虛入客腸胃水穀不
化泄瀉注下

方見滯下門

按此方名曰治風其實和血之藥也

治熱之劑

局方戊己丸治脾胃濕熱泄痢不止

方見滯下門

按泄瀉局方多以為寒至劉張始言有屬熱屬火之

證故諸方中治熱瀉之方甚少然仲景治傷寒挾熱下痢用葛根黃芩黃連湯但人未之思耳

治暑之劑

局方來復丹治伏暑泄瀉如水

方見本方

易簡云硝石性寒佐以陳皮其性疎快硫黃且能利人若作煖藥以止瀉誤矣蓋由啖食生冷或冒暑熱之氣中脘閉結揮霍變亂此藥通利三焦分理陰陽服之甚驗

按此出厥陰硫黃例藥也

香薷飲治伏暑吐瀉

方見暑劑

按此治暑之表藥也肺脾經藥也出太陰厚朴例

宣明桂苓甘露飲治飲水不消嘔吐泄痢或下痢赤白

方見暑劑

按五苓散益元散加寒水石解利濕熱太陽經藥也

治寒之劑

機要漿水散治暴瀉如水周身汗出一身盡冷脉微而

弱氣少不能語甚者加吐此為急病

半夏

一兩湯洗

附子

半兩泡桂

五錢

甘草

炙五錢

良薑

二錢半

乾薑

一作乾生薑五錢

右為細末每服三五錢漿水二觔煎至半觔和滓熱

服

白朮湯

白朮

芍藥

甘草

炙各三錢

乾薑

半兩炮

右如前服甚者去乾薑加附子三錢謂辛能發散也
局方理中湯治臟腑停寒泄瀉不已

方見寒劑

按此出厥陰已寒例藥也以上用薑附之藥皆為暴瀉氣脫如五虛等證救急之劑所謂暴瀉非陽者也然有屬火者亦當求責

治風寒濕之劑

本事麴蘖丸治中風或中風濕臟腑滑瀉

川芎

附子

炮

神麴

白朮

等分

右為細末麵糊丸桐子大每服三五十九溫米飲下
此藥亦治飧泄

按此出太陰例藥也

止澁之劑

按諸方論並見滯下門

去積之劑

本事溫脾湯治痢冷在腸胃間泄瀉腹痛宜先取去然
後調治不可畏虛以養病也

厚朴

乾薑

甘草

桂心

附子

生谷二兩

大黃

生四錢碎切湯一觔漬半日搗去滓煎湯時和滓下

右細剉水二升半煎八合後下大黃汁再煎六合去

滓服

按泄痢腹痛其證多種有積滯者固宜取去豈但痢冷一端而已須詳證虛實寒熱隨其所宜以調之

升發之劑

東垣升陽除濕湯自下而上者引而竭之

升麻

柴胡

防風

神麴

澤瀉

猪苓

各半兩

陳皮

三錢

蒼朮

一兩

大麥蘖麴

甘草

炙各三錢

如胃寒腸鳴加益智

仁半夏各半錢薑棗同煎非腸鳴不得而用之

右作一服水煎早飯後熱服之

升陽除濕防風湯如大便秘塞或裏急後重數至圓而不能便或有白膿或血慎勿利之利之則必致重病及鬱結而不通也以此湯舉其陽則陰氣自降矣

蒼朮

泔浸去皮乾淨四兩

防風

二錢

白朮

白茯苓

白芍藥

各一錢

右咀除蒼朮另作片子水一碗半煎至二觔內諸藥同煎至一大觔熟服食前

按飲食入胃氣上升輸精心肺然後下降若脾胃有傷不能上升反下流腎肝而成泄痢者法宜填補中氣升之舉之不可疎下此東垣發前人所未論也

調補脾胃之劑

錢氏白朮散治小兒泄瀉胃熱煩渴不問陰陽並宜服

之

人參

白茯苓

白朮

木香

甘草

藿香

各一兩

乾薑

按中論即是葛根

右為末水煎

按此太陰經四君子例藥也治小兒陽明本虛陰陽不和吐瀉亡津液煩熱口乾以參朮甘草甘溫補胃和中木香藿香辛溫芳香可以助脾茯苓甘平分陰陽導水濕葛根甘平倍於衆藥其氣輕浮鼓舞胃氣

上行津液又解風肌熱治脾胃虛弱泄瀉之勝藥也
易簡白朮湯治證同前

前方藿香改黃芪是也

秘藏黃芪補胃湯治一日大便三四次澹而不多有時
泄腹中鳴

黃芪

當歸身

柴胡

益智仁

陳皮

各三錢

甘草

炙二錢

升麻

六分

紅花

少許

右咀作一服水煎食前服

補腎之劑

機要肉豆蔻丸治腎泄久不愈脉沉細無力者效

破故紙炒

肉豆蔻

麩裏煨各等分

右為末棗肉為丸桐子大飲湯下空心本事方破故紙四兩肉豆蔻二兩名二神丸治脾腎虛弱

本事五味子散治腎泄

五味子

二兩

吳茱萸

半兩細粒綠色者

右二味炒香熟為度細末每服二錢陳米飲下一

親識每五更初曉時必溲泄一次此名腎泄服此而愈

局方金鎖正元丹治腎虛泄瀉小便頻數虛冷之證

五倍子

茯苓

各八兩 硃砂 別研 三兩

龍骨

煨 三兩

紫巴戟

去心 一斤

補骨脂

酒浸炒 十兩

肉從蓉


洗焙

葫蘆巴

焙 各一斤

右為末入研藥令勻酒糊丸桐子大每服三十丸空

心溫酒鹽湯任下



玉機微義卷六

欽定四庫全書

子部

玉機微義卷七至九

詳校官太醫院醫士_臣趙正池

編修_臣倉聖脈覆勘

總校官知縣_臣繆琪

校對官主事_臣陳文樞

謄錄監生_臣錢朝熙

欽定四庫全書

王機微義卷七

明

徐用誠

原輯

劉純

續增

瘡門

內經叙瘡

內經云夏傷於暑秋必痎瘧又云先寒後熱者名曰寒

瘧先熱而後寒名曰溫瘧其但熱而不寒者名曰瘧瘧

按內經論瘧謂陰陽相并之虛實發為寒熱歷叙四

時及六經五臟與胃之瘧以至連日間日發之蚤晏
最為詳盡學者必通考全文以熟玩之

瘧脈

畧要云師曰瘧脈自弦弦數者多熱弦遲者多寒弦小
緊者下之差弦遲者可溫之弦緊者可發汗針灸也浮
大者可吐之弦數者風發也以飲食消息止之
脈經云瘧脈自弦微則為虛代散則死

瘧備三因

陳無擇云夫瘧備三因外則感四氣內則動七情飲食
飢飽房室勞逸皆能致之經所謂夏傷暑秋痎瘧者此
則因時而叙耳不可專以此論外所因證有寒瘧有溫
瘧有痺瘧並同素問有濕瘧者寒熱身重骨節煩疼脹
滿自汗善嘔因汗出復浴濕舍皮膚及胃雨濕有牝瘧
者寒多不熱但慘戚悵慄病以時作此則多感陰濕陽
不能制陰也五種瘧疾以外感風寒暑濕與衛氣相并
而成除痺瘧獨熱溫瘧先熱牝瘧無熱外諸瘧皆先寒

後熱內所因證病者以蓄怒傷肝氣鬱所致名曰肝瘧
以喜傷心心氣耗散所致名曰心瘧以思傷脾氣鬱凝
結所致名曰脾瘧以憂傷肺肺氣凝痰所致名曰肺瘧
以失志傷腎所致名曰腎瘧所致之證不同素問此五
種瘧疾以感氣不和鬱結痰飲所致不內外因有疫瘧
者一歲之間長幼相似有鬼瘧者夢寐不祥多生恐怖
有瘴瘧者乍熱乍寒乍有乍無南方多病有胃瘧者飲
食飢飽傷胃而成世謂食瘧有勞瘧者經年不差前後

復發微勞不任亦有數年不差結成癥癖在腹脇名曰
老瘡亦曰母瘡已上諸證各有方治宜推而用之

按無擇有七情感動鬱氣成瘡之論可謂發千古之
未發但所集隨證施治之方皆是溫熱脾胃之劑止
有四獸飲云治五臟氣虛結聚涎飲夫以各臟君臣
之藥補虛瀉實之法各各不同豈可以一方通治七
情之瘡哉豈欲學者自求之與嗟夫醫之為學宋三
百年錢仲陽之下一人而已其集方者尚如是欲使

人據證檢方烏可得也

論痰能致瘧

嚴用和云素問謂瘧生於風又夏傷於暑此四時之氣也或乘涼飲冷當風臥濕饑飽失時致脾胃不和痰積中脘遂成此疾所謂無痰不成瘧一日一發易治間日一發難愈三日一發者尤其難愈

按此謂胃氣不和痰積中脘而成瘧則自內而生病於外也與素問風暑外傷雖異然外既受傷則內氣

必鬱亦生痰此自外而生病於內也瘧而挾痰誠有之矣其引以無痰不成瘧之一句則失之偏也其用藥治法亦且未詳

瘧分三陽三陰淺深之異

病機機要云經曰夏傷於暑秋必瘧瘧傷之淺者近而暴傷之重者遠而為瘧疾者久瘧也是知夏傷暑氣閉而不能發泄於外邪氣內行至秋而為瘧也有中三陽者有中三陰者其證各殊同傷寒也在太陽經謂之寒瘧治多汗之

在陽明經謂之熱瘧治多下之在少陽經謂之風瘧治
多和之此三陽受病謂之暴瘧發在夏至後處暑前此
乃傷之淺者近而暴也在陰經則不分三經總謂之濕
瘧當從太陰經論之發在處暑後冬至前此乃傷之重
者遠而為疾瘧者老也居西方宜毒藥療之

按此分風暑所傷有陰陽淺深之異發前人所未論
也

詳見後論中

瘧非脾寒及鬼食辨

後添論斷

子和云內經既以夏傷於暑而為瘧何世醫皆以脾寒治之用薑附硫黃之類甚者歸之崇恠良可笑耶又或因夏月飲食生冷之類指為食瘧此又非也豈知內經之論則不然皆夏傷於暑遇秋風寒而後作也邪熱淺則連日邪熱深則間日併入於裏則寒併入於表則熱若此論則了不相干於脾也治平之時其民夷靜雖用砒石辰砂有毒之藥以熱治熱亦能取效擾攘之時其

民勞苦內火與外火俱動以熱攻熱轉為吐血瀉血瘡
瘍嘔吐之疾豈與夷靜之人同治哉余嘗用張長沙汗
吐下三法愈瘡病極多大忌錯作脾寒治之

按此云無脾寒及鬼瘡皆是得之於暑又謂平治與
擾攘之時治瘡不同皆確論也然食瘡則世亦有之
者然觀其用藥以白虎加人參湯小柴胡五苓桂苓
甘露之類則調之也甚者臟用承氣大柴胡下之更
不愈以常山散吐之悉是寒藥降火之劑蓋以瘡從

火之化也又有謂治窮荒貧賤之人與富貴膏粱不同之論固是然仍用溫脾散辰砂丹劫藥貧賤之人豈與治平時人同歟貧賤者脾胃虛寒其可用劫劑歟此恐非出於子和之筆也學者試思之

或問俗以瘡為脾寒何也曰此亦有理天地之間惟吳楚閩廣人患此至多為陽氣之所盛處其地卑濕長夏之時人多患暍瘡霍亂瀉痢傷濕熱也本暑盛陽極人伏陰在內脾困體倦腠理開發或因納涼於

水閣木陰及泉水澡浴而微寒客於肌肉之間經所謂遇夏氣淒愴之小寒迫之是也或勞役飢飽內傷而即病作故指肌肉屬脾發則多惡寒戰慄乃謂之脾寒爾實由風寒濕暍之邪鬱於腠理夏時毛竅疎通而不為病至秋氣斂之際表邪不能發越故進退不已往來寒熱病勢如凌虐人之狀所以名瘧即四時之傷寒故十二經皆能為病古方治法多兼於理內傷取效脾胃和而精氣疎通陰陽和解諸邪悉散

此實非脾病也但病氣隨經升降其發早暮日次不
等內經具病例已詳季世以發表解肌溫經散寒等
法亦未嘗執於燥脾劫劑也又曰既瘧本夏傷於暑
為病世有不服藥餌或人與符咒厭之亦止何也曰
此夏時天地氣交百物生發濕熱熏蒸禽蟲吐毒之
際人因暑熱汗出神氣虛耗感得時間乖戾之氣為
病故與厭之亦止若移精變氣之謂也然古人稱瘧
不得為脾寒者正恐人專於溫脾之說不明造化之

源而失病機氣宜之要故也

痰瘧

丹溪曰內經謂夏傷於暑至秋為瘧又曰瘧瘧皆生於風痰瘧老瘧也以其隔兩日一作纏綿未去前賢或用峻劑恐其稟受怯弱與居養所移者所宜始悟常山烏梅砒母劫劑或誤投之輕病為重重者危矣夫三日一作者陰經受病也作於子午卯酉少陰瘧也作於寅申巳亥厥陰瘧也作於辰戌丑未日太陰瘧也瘧得於暑

當汗而解或因取涼太過汗鬱成痰其初感也弱者即
病胃氣強者伏而不動至於再感復因內傷其病乃作
宜其難差夫感暑與風皆外邪也非汗多不解求治
者皆已經試却劑胃氣重傷似難連愈必先與參朮等
補劑加減以取汗得汗而虛又行補養下體屬陰最難
得汗補藥力得汗出至足方是佳兆又有感病極深邪
氣必自臟傳出至腑其發無時若發於午之後寅之前
者血受病也為難愈須漸漸趨蚤方是佳兆故治此病

者春夏易秋冬難大忌飽食以汗之難易為優劣也僉
憲詹公春得痰瘧累試切藥綿延至冬來求治予知其
久得汗惟胃氣未完非補不可一味白朮末之粥丸與
二斤盡藥大汗而安如此者多但畧有加減不必盡述
按內經以瘧從風寒暑而得之乃天之邪氣所傷當
以汗解仲景河間悉用發表之藥但以寒熱多少分
經絡而治然亦有三陰三陽之異也蓋傷在陽者遲
而暴傷在陰者遠而深在氣則發之早在血則發之

晏淺則日作深則間之此雖分在陰在陽是乃淺深
之謂皆當從汗而解也機要謂在三陽經其汗下和
解同傷寒治外邪解而內未已者以蚤晚分氣血而
用大柴胡大承氣桃仁承氣下之久瘡胸中鬱鬱欲
吐而不能吐當以藜蘆散雄黃散吐之此為暴病而
氣實者設也我丹溪先生論邪氣深入陰分血分而
成久瘡者當用升發之藥自臟而出之於腑然後自
表作汗而解若用下藥則邪氣愈陷下而難出也又

久瘧之人正氣虛者不可用劫藥損其胃氣劫之數
次不愈者病若不變必待春來氣升瘧氣隨升發之
氣而出方已遇此者當以補之一婦人久痢一子亦
痢死哭甚數日後痢止瘧作醫與四獸飲之類凡兩
月名予視之一日五六作汗如雨無休歇不能起臥食
少懶語脈微數予以痢後無陰悲哀傷氣又進濕熱
之藥助起旺火正氣愈虛汗既大出無邪可治陰虛
陽散將在旦夕豈小劑之所能補今用人參二兩白

朮二兩芍藥一兩黃芪半兩甘草少許作一服濃煎
一鍾日服四五次兩日寒熱止又二婦同病瘧一者
面光澤予以濕在氣分非汗不解兩發汗出而愈一
者面赤黑色予以暑傷血分用四物湯加辛苦寒之
劑二日發唇瘡而愈臨病處治其可執一乎前論又
有食瘧痰瘧疫瘧瘴瘧者其方皆未備學者又當
隨證而思其所以治之也

瘧門治法

解表之劑

仲景白虎加桂枝湯治溫瘧

知母六兩

甘草二兩炙

石膏一斤碎桂枝三

兩粳米六合

右咀以水一斗二升煮米熟去滓煎至三升溫服一升日三服汗出愈

按此太陽陽明經藥也

柴胡桂薑湯治寒多微有熱或但寒不熱名曰北瘧

柴胡 八兩

桂枝

黃芩 各二兩

枳

薑根 四兩

牡蠣

甘草 炙

乾薑 各二

兩

右咀水煎服一升日三初煩汗出愈

按此少陽太陽經藥也

機要桂枝羌活湯治瘧處暑以前發頭項痛脈浮惡風有汗

桂枝

羌活

防風

甘草 各半

兩

右為粗末每服半兩水一觔半煎至一觔溫服清迎
發而服之如吐加半夏麴

麻黃羌活湯治證如前惡風無汗

麻黃去節

羌活

防風

甘草各半

兩

右如前服加法同

按以上二方太陽經藥也

治瘧病身熱目痛熱多寒少脈長先以大柴胡下之微利為度後餘熱不盡者當服白芷湯以盡其邪

白芷一兩

知母一兩七錢 石膏

四兩

右粗末依前服

按此陽明經藥也

桂枝芍藥湯治瘧寒熱大作不論先後此太陽陽明合病也謂之大爭寒熱作則必戰經曰熱勝而動也發熱則必汗泄經曰汗出不愈知內熱也陽盛陰虛之

證當內實外虛不治恐久而傳陰經也此湯主之

桂三錢

黃芪

知母

石膏

芍藥 各一兩

右粗末每服五錢加至一兩水煎

按此太陽陽明經藥也

桂枝黃芩湯如服前藥轉大者知三陽合病也宜此和之

柴胡 一兩二錢

黃芩

人參

甘草 各四錢半

半夏 四錢

石膏

知母 各五錢

桂枝 二錢

右為粗末依前服之前服此藥已如外邪已罷內邪未已再服下藥從卯至午發者宜大柴胡下之從午至酉發者知其邪氣在內也宜大承氣下之從酉至子發者或至寅發者知其邪氣在血也宜桃仁承氣下之微利後更以小柴胡徹其邪氣可也

按此太陽陽明少陽經藥也以上諸方並係發風寒

暑熱之氣自外而入中於三陽之經者也

桂枝石膏湯治瘧無他證隔日發先寒後熱寒少熱多

桂枝五錢

石膏一兩半

知母一兩半

黃芩一兩

右為粗末分三服水煎服

按此太陽陽明經藥也治隔日發則邪氣所含深者也

麻黃黃芩湯治瘧發如前證而夜發者

麻黃一兩去節

甘草炙三錢

桃仁三十箇去皮尖

桂二錢

黃芩五錢

右為細末依前服桃仁味苦甘辛肝者血之海血驟則肝氣燥經所謂肝苦急急食甘以緩之故桃仁散血緩肝謂邪氣深遠而入血故夜發乃陰經有邪此湯發散血中風寒之劑

按此治風暑深入陰分而夜發乃血受病邪氣所舍尤深者也麻黃桂枝桃仁等乃太陽經血藥也非三

陰經藥也

溫熱燥脾之劑

寶鑑交解飲子治痰瘧辟瘴氣

肉豆蔻

草豆蔻

各二箇麩裏煨熟一箇生用

厚朴

二寸半生半薑汁製

大甘草

二寸生炒各半

生薑

二塊一生一濕紙煨熟

右等分銀石器內水煎發日空心服未愈再服必效
局方常山飲治瘧疾發散不愈漸成勞瘵

知母

川常山

草果各二斤

良薑

二十兩

甘草

炙一斤

烏梅去核一斤

右咀薑五片棗一枚水煎溫服

易簡七寶飲治一切瘧疾或先寒後熱或先熱後寒不

問鬼瘧食瘧

常山

厚朴

青皮

陳皮

甘草

檳榔

草果仁等分

右咀每服半兩於未發隔夜用水一碗酒一觔煎至

金匱要略卷之七
一、大觥瀉出露一宿，再將滓如前煎，另放亦露一宿，來日當發之。蚤溫溫面東先服，頭藥少歇，再服藥，粗大有神效。

人參養胃湯治外感風寒內傷，生冷四時溫疫，或飲食

傷脾發為痰瘧。

方見局方

平胃散加人參、茯苓、半夏、草果、藿香、生薑、烏梅煎。

按此平胃散加減法也，出太陰厚朴例以上諸方悉

是溫脾燥烈之藥蓋認此疾為脾寒故也然人用之
亦或有效遂指為治瘧之良方殊不知偶值病者陰
陽相并脾氣鬱結暫得溫散則氣易行濁液凝痰中
皖閉塞因得燥熱亦以暫開所以氣通而疾止內經
所謂勇者氣行則已是也此古人為病氣淺而厚質
者設也若中氣虛弱之人內有鬱火之證復用燥熱
愈劫愈虛咎將誰執

嚴氏清脾湯治瘧瘧脈來弦數但熱不寒或熱多寒少

金匱要略卷之七
口苦咽乾大小赤澁

青皮

厚朴

白朮

草果

柴胡

茯苓

半夏

黃芩

甘草 炙等分

右咀薑五片煎

按此小柴胡湯加減也治口苦咽乾大小赤澁則是
內熱之證用柴胡黃芩所以瀉少陽之熱乃前方溫
脾之一變也方名清脾其義可知然後以草果等藥

寒熱兼用則是未能免俗也

三因四獸飲治五臟氣虛七情兼并結聚澁飲與衛氣
相搏發為瘡疾兼治瘡瘡

半夏

茯苓

人參

草果

陳皮

甘草

烏梅肉

白朮各等

分

右咀同棗薑等分以鹽少許淹食須厚皮紙裏煨令
香熟焙乾每服半兩水煎未發前併進三服

按此四君子加減也出太陰藥例

七棗湯治五臟氣虛陰陽相勝乍為痲瘡不問寒熱先
後並治

附子 一枚炮以鹽水浸再炮如此七次去皮臍

右剉水一碗薑七片棗七箇煎至八分當發日空心
溫服

按陳無擇謂七情感動鬱氣成瘡故此二方以治五
臟氣虛結聚涎飲等證未審孰為補虛孰為散結鬱

孰為導痰學者宜自詳之

消瘡之劑

仲景鱉甲煎丸治瘡不差結為癥瘕名曰瘡母

方見金

價

嚴氏鱉甲飲子治瘡久不愈腹中結塊名曰瘡母

鱉甲

醋炙

白朮

黃芪

草果

檳榔

芎藭

橘紅

白芍

甘草

炙

厚朴等分

右咀生薑七片棗一枚烏梅少許煎

按痰瘧多成癖於左脇之下名曰瘧母乃肝之積也瘧屬少陽病少陽東方之氣故同歸於肝又況久瘧病在血分血亦屬肝所主也當以鱉甲君佐使之藥隨證虛實用之不必泥此也

消食之劑

三因紅丸子專治食瘧

蓬朮

三稜 各二兩醋煮一伏時

胡椒 一兩

青皮 三兩炒

阿魏 一分醋化

右為末別研蒼朮末用阿魏醋米糊為丸桐子大炒土硃為衣每服五十至百丸

按此出厥陰南星半夏例消積滯通鬱氣之溫藥也食瘡既因飲食而得亦當隨其所傷而治之

吐瘡之劑

子和常山散吐瘡

常山 二兩水煮晒乾



右水煎空心服

機要梨蘆散

雄黃散

方並見吐劑

按瘡因外感病屬上焦又胸膈多結聚痰涎故用吐法以取效然常山砒霜之類發吐取涎縱使獲安脾胃不能不損能用無毒之藥以取效者為佳

寶鑑溫脾散治瘡疾寒熱發歇多時不差

紫河車

萊豆

各一兩

甘草

半兩

生砒

一兩半另研子和作錢半

右為末與砒一處研勻每服半錢新汲水少許調下
須於發日隔夜夜深服藥忌葷酒瓜果生冷魚腥肉
物三日孕婦勿服但至心合此藥與人並不吐此雖
有砒一味河車甘草葉豆三味性涼解得新水亦解
得

一剪金治瘡疾乃是聖藥也

信豆硫黃各等分

右作一處乳鉢內杵為末用緋絹子捻藥一捻在絹

上裹如豆大細絲牢纏定訖剪下每服一九星宿全
用新汲水送下空心服毋令人知或先一日夜服之
辰砂丹治瘡

硃砂一兩五錢入藥中留五錢為衣 信

雄黃各五錢另研

右為末入白麴六錢研勻滴水丸如棗豆大硃砂為
衣星宿全時用無根水吞下

宣明辟邪丹治嵐瘴鬼瘧食瘧

菴豆

雄黑豆 各四十九箇

信砒 半錢另研

硃砂 二粒

黃丹 一錢為衣

右為末同入乳鉢內滴水為丸分作三十粒每服一
粒用東南桃心取七枝研汁將井花水於發日蚤辰
日欲出未出向日吞之醋湯亦得

三因紅散子

黃丹 炒色變

右入建茶合和二錢匕白湯調下或溫酒調下一方

用蒜不以多少杵黃丹丸雞頭大每服一九臨晨面
東新水下

按瘡丹多用砒霜大毒之藥本草主諸瘡風痰在胸
膈可作吐藥蓋以其性之至燥大能燥痰也黃丹本
草能主驚癇癰疾除熱下氣亦是勝痰去積之藥大
抵瘡丹雖有燥痰之功大傷胃氣脾胃虛者切宜戒
之

謹按治瘡之方風暑外傷者解表之藥機要詳矣痰

瘡之治宜從丹溪所論陳無擇論濕瘡有木附湯此
不詳載又機要有中三陰經之論而治法用藥雖有
瘡瘡入血之一方然亦失於詳悉嚴氏謂瘡生於痰
三因疫瘡食瘡瘡七情感動等瘡而諸方未有可
取況亦多所缺畧竊觀其意蓋以脾濕燥熱之方可
以兼治諸瘡故不詳述此缺畧之所由也學者知其
名識其意苟能思之則可得而施治矣又何必待其
詳也哉

玉機微義卷七